



ОРГАН ЛЕМКОВСКОГО СОЮЗА.

Выходит в четверг около 15-того и 30-того каждого місяця.

Редакция и администрация в Крыници. — Адрес: „Лемко“ Крыница.

Пренумерата в краю:

30 грошей місячно,
1-50 зол. подрочно,
3 зл. рочно.В Америці: 50 центов подрочно,
1 \$ рочно.

В Чехословакии:

2 кор. місячно, 9 кор. подрочно,
18 кор. рочно.

Конто чекове Нр. 404.155.

ШТО НАМ РОБИТИ

Задачом Лемковского Союза ест передовсім дбати о поліпшаня долі в наших селах и быту нашого хлопа.

Тяжкий кризис господарский, котрый даея отчути во вшитых отраслях жытя приневолят каждого призадуматися над его причынами и глядати дороги, якбы выйти з трудного теперешнього положыня.

Вокруг слыштыся, же головна причына зла лежыт в перестарілой формі економичного устройства — недопасованого до змінених потреб державного жытя.

Сильно розвинена техника — надпродукция товаров промышленных и рольничых сталися причыном безработя и економичного кризиса. Так повідают одны. — Другы утврджают и може не без рации, же властиво ніт ниякой надпродукции лем же люди побідніли и не можут куповати навет того, што им доконче потребне. Ніт у нас за дуже хліба, мяса, обуця, одежи, рольничых знарядов и многих других річей, але тых річей никто не купуе в выстарчаючом количестві — каждый обходится чым небуд — каждый стігат ремен, каждый латат и толче біду як може, штобы якоси перетримати тоту біду. Дятого то нерозкуплены товары лежат и повстае надпродукция а властиво надвыжка подажи над за потребованьом.

Як довідуемєся зо статистики послідных кризисовых літ — роботники рольны — зарабяют денно кромі ідла около 12 грошей денно. — Нич дивного, же такый роботник не може куповати собі потребных річей, бо не має за што, а товары выпродукованы во фабрыках лежат в магазынах.

Продукты рольны мают барз низку ціну, и дятого село не може куповати конечных продуктов промышленных. Тотот отбиватся не лем на селі але и на промышленности, бо коли в р. 1929 ищы употреблено у нас 153 тысяч килограмов камфины то в році 1933 лем 118 тысяч kg. Тотот само зауважатся при соли, цукрі, желізі и многих других продуктах нашой промышленности. Ніт оборотов медже селом и містом — а в слід за тым иде стагнация. Стараньом отже каждого з нас ест старатися 1) о обнижене ціны товаров промышленных, обнятых картелями 2) о повышене цін тых товаров, котры має газда на продаж.

В послідных часах дае зауважытися оживлене в промышленной продукции и то достильне. Однак помимо того не знати поправки.

Не може она нагло наступити, бо кризис економичный обнял цілый світ, и выкликал так великы страты, же не дастся того пополнити и отробити в коротком часі. Поправа мусит поступати поволи, бо лем втотчас ест она потішаюча, яко послідство напруженого труда. Кажда нагла поправа не оперта на труді былабы штучна и потяглабы за собом ищы по глублене кризиса. — Штобы однак была тревала — мусит обняти вшиты галузи на-

шого економичного жытя. А того до тепер ніт. Поправилось в промышленности, але не поправилось нич у хлопа, котрый за товары промышленны мусит дорого платити, а хліб, масло, яйця продае за полдармо. Штобы поліпшати свою долю треба нам также организуватися бо лем втотчас, коли вшиты станеме в ряды Лемковского Союза в Горлицях — даме тому Союзови силу, котрой он ужые для добра нас вшитых. Втотчас можеме быти певны, же и в наше оконце засвітит сонце, а в наши дома завитат добробыт.

ОТОВВА

Центр. Талергофскаго Комитета По случаю 20-літя масовых арестов и казней русских людей

Вшиты памятаме 1914 рок. Раньше, чым лягли головы на военном побоевищи, пали под ударом палача невинны жертвы галицко-русского народа. Кого оминула шибениця — тот гнил літами по австрийских вязницах на далекой чужыні.

Но найглубше врзалася в душу народа вязница в Талергоф. 5000 лучших сынов галицкой Руси не увидило уж больше своей отчыны. Раз на все они останутся на немецкой землі под тинистыма соснами.

Однак в 20 ту рочницю великой, народной трагедии необходимо перевезти на родну землю тлінны останкы хоцбы лем одного Талергофского мученика

День Талерговского Зізда во Львові уж близкий. Але зо смутком и встыдом приходится признати, што

ани на перевоз тлінных останков з Талергофа

ани на организацию самого зізда

ани на друковане отповідной літературы, летучок, отозв и пр.

ани на достойне устройство академии, концерта и походу,

ани на принятые гостей

ани на другы непредвиджены розходы средств в касі Центр. Талергофского Комитета.

Горячо просиме вшитых русских свидомых людей о найскоршу помоч. Повтаряме, што ден зізда уж недалекий. Роботы и старань з каждым дньом все больше и больше. Росходы величезны а приходов праві жадных:

2—3 зл. денно. Ціла Прикарпатска Русь в краю и за его границями повинна готовитися до народного торжества з як наибольшым упорством и дати возможность Центр. Талергофскому Комитетови завершыти тотот діло так, як того вымагат 20 літя геройского мученичества нашой Матери-Руси.

Львов, 20 марта 1934.

За Центр. Талергофский Комитет:
Секретар Предсідатель
(—) Б. Ольшанский. (—) А. Гулла.

Золзы у коней

Часто западають особенно молоды коні на золзы. Хворота тотот не ест опасна, належыт ю однак отличати от носатизны, котра ест барз опасна и трудна до вылігныя.

Кромі того носатизном може заразитися человек, для котрого ест она смертельна, отже треба уміти отличати тоты дві хвороты.

Золзы сут заразливом хворотом, выкликаном бактериями. Коні мают горячку, з обох ноздрей (при носатизні з одного) тече оток, под обома щеками повстают мягкы опухлины котры даюцца пересувати (при носатизні опухлина ест тверда и не дае пересуватися).

Коли опухлина дозріе, треба ю перерізати острым ножом широко на три пальці, штобы оток мог отпльвати. Оток при золзах ест барвы сметаны, а при носатизні водяный, зеленкуватый. Оток належыт добрі выдусити, а рану двараз денно шпырцувати 2% креоли-

новом водом або 1% лизольовом. Рану не за-
тыкати, шtbody оток все отходил. Кормити
коня легкоствавном пашом, котру треба класти
на землі, шtbody при згынанию оток ліпше
отходил. — Коли оток перестает отходити —
рана при золзах гоится барз легко и скоро —
а при носатизні трудно и поволи. При тяж-
ких случаях треба закликати ветеринара, ко-
трый стосує суровицю против золзову.

Поддержка продукции краевой волны

Рішеньом з 22 січня 1934. Министер Роль-
ництва зарядил, же при výroбах волняных
для войска и правительственных институций
фабрыкы мают домішувати 45% волны краевой.
До того часу домішували лем 40%. Министер-
ство стремит до того, шtbody як найвече
ужывати свого суровця — а не спроваджати
его з других держав, як то до недавна ро-
блено.

Весна в господаретві

Календарева весна начынатся 21 марта, але
на селі рахуют яр от Великодня.

Каждого року вяжеме з весном надежду
на дашто ліпше. — Поправится — поправит,
бо поправится мусит, бо все не може быти
злі?!

Але тымчасом приходит предновок и само-
му ніт што дуже істи и жывина тьж голодує,
Тому то треба дбати о того, жебы солома,
ци сіно, бурак, ци комлеры, яки даєме жы-
вині были через звірята выкористаны.

Памятайте, што:

1) Лем добрі стравлена паша иде звірятам
на хосен.

2) Соль помагат до стравлення, отже не жа-
луйме гроша на соль, бо з него збереме зло-
ты в молоці мясі и здравю наших звірят.

Справа Апостольской Админи- страции на Лемках

В звязи з утвореньом самостоятельной Ап.
Администрации для Лемков в Рыманові круги
ватиканскы заинтересувалися церковными
справами на Гуцульщынi, де наміряют также
утворити отдільну, независиму от станицла-
вовского епископа администрацию и навет
вычсыляют, яко кандыдата на администратора
О. Сліпого зо Львова.

О. Нагорянский чуєся нездоровым и не
обыйме віроятно лемковской администрации.
На его місце вычсыляют яко кандыдатов О.
Илькова — войскового капеляна з Лодзи
и О. Дра Василя Масцюха, настоятеля при-
хода Горожанна. О. Др. Масцюх — уродже-
ный лемко — з Новосанецкого повіта, автор
супружого права — бывший доцент универ-
ситета ест знаный з рускых переконань, за
што пришлось ему терпіти в Талергоф. —
Знаючи его такт, энергию и почуте справе-
дливости, мы певны, же переможе всякы
трудности и запровадит на Лемках единство
и згуду, што прииде О. Дру Масцюху тым
лекше, же люде отнесутся до него, яко до
лемка з великым довір'ом.

Поміщайте оголошшыя в газеті „Лемко“.
Хто хце прислужытися нашой газеті
нехай зберат оголошшыя з міст и сел по-
вітов Леско, Сянок, Кросно, Ясло, Горлиці
и Новый Санч.

Дорогы Братя Лемки, Русины!

Витам вас вшиткых, котры занялистеся вы-
даваньом газеты „Лемко“, котра ест нам до-
бре знана ищи з перед войны. Здавалося,
што уж Лемко проспал, бо знаме, килько тер-
піня перенес, як его катовали и поневерали,
як пережыл он талергофске пекло и други
тюрмы. Але тоты вшиткы біды не зломил
сильной и твердой натурой лемков — они
жыют дальше — а в остатних часах про-
являют зас свою силу. Одним таким про-
явленьом оживлення Лемков ест газета Лемко,
котру витаме, як тоту ранну зарю, звiщаючу
нам культурне просвіщенє и ліпшу будучност.
Газета Лемко, як мы з першого чысла пере-
коналися, стоит в обороні руского народа
и прадідной віры — тых наших найбільшых
скарбов — котры хотят высмівати теперешни
многы сыны нашего народа. — Тоты свя-
щенники — походячы з руского народа,
котры назвали себе украинцями, котры вы-
учылися за тяжко — и кырваво зароблены
грошы своих родичей — русинів, тоты, котры
покончыли высокы школы, де аж переучылися,
бо днеска сами не знают, што ліпше, ци Укра-
ина ци Русь, ци віра тверда ци мягка — ци
з женами ци без жен, ци з Йосафатом, ци

без него. — Иде така борба долгый час,
а мы ділимся, не множыме, отнимає. не
додаєме и длятого высмівають нас культурны
народы и длятого у нас ест біда — бо она
любит темноту. У нас ест за мало таких,
котры дбают о народ, котры занимаються
просвітительном роботом для свого народа,
шtbody двигнути наш народ на уровень куль-
турного світа.

Одним з тых рідких людей, дбаючих о до-
бро наших людей был пок. наш священник
О. Декан Теодор Мерена, котрый через 50 літ
учыл нас триматися твердо прадідной віры
наших предков св. Ольгы и Володимира Вел.
Сам он позостал до смерти вірным своей
науці, бо коли в Талергоф налягали на него,
шtbody вписался на украинску листу, то буде
увольнений, он отрек, што родился на русской
землі, іл русский хліб и хоче умерати под
трираменным крестом и спочывати в Ріпнику.
И таким остался до смерти, — рускым и шы-
р'ячим вокруг себе любов и згуду. Мы ша-
нуєме его память и будеме жыти так, як он
нас учыл, як учыт нас наша история и як
учыт нас газета „Лемко“.

Газдове з Петрошой-Волі.

Памяти великого славянского ученого

Пред 50 роками помер польскый ученый
Вячеслав-Александр Маціевский. Он был до-
брым патриотом польскым, але вірил, же лем
втотчас славянскы народы займут належну
им позицию, коли получатся разом. Он го-
рячо вірил, же вшиткы недорозуміня медже
Польшом и Русьом уступят місця их кровно-
му родству и же з часом тоты народы зро-
зуміют, же в интересі обох тых народов ле-
жыт, помагати соб. взаимно. Он также ставал
в обороні всходнього обряда и византийской
культуры и виголосил теорию, же в Польші
христианство початково шырилося по всход-
ньому обряду, а лем погодивше всходний
обряд уступил місця заходньому. Теорию тоту
операл Маціевский на том, што в тых давних
часах, коли св. Кирил и Методий завели на
Морвах христианство по всходньому обряду,
польска держава, котрой центром был Кра-

ков, была тісно звязана з Моравами, откаль
христианство розшырилося и на польскы
землі и доперва потом впроваджено на поль-
ских землях обряд заходний.

Вшиткы тоты теории Маціевского стреміли
до того, шtbody злучыти славянскы народы
и усунути всяку незгуду медже нима.

Шtbody отдати чест тому проповідникови
славянской — братской любви — посвячено
третий том журнала: „Przewodnik Historyczno-
Prawny“ памяти бл. п. Маціевскому, и там
видиме мы частичне исполненє мечт Маціев-
ского, бо выказаны в том: „Przewodniku...“
слова о великих его заслугах для славянства
сут поміщены праві на вшиткых языках сла-
вянских, а на першом місци поміщено росправу
професора Тарановского, написану по рускы,
што дає доказ, же идея получыня славян
обыймає шtbodyраз шыршы круги.

О чым каждый газда мусит знати?!

Як нищыти хвасты?

Тяжко ест тепер каждому газдови и мусит
он барже як даколи стеречи своего добра
перед злодіями.

Здавалобсы, што каждый знає о том точно
и не треба никому того припоминати.

А однак.. ест одна област господарства —
где газда позвалят окрадатися каждого року
не превеликы сумы — видит того злодія и
смотрит на него спокойно.

Тым злодіюм ест бурян и други хвасты
на полю. — Хвасты сут рослинами и так як
другы рослины потребууть они до жыты во-
ды, світла и корму. Розрастаются они скорше
от хліба и крадут им воду и корм и засту-
пят солнце.

Почва наших грунтов ест уж з натуры
дост бідна, не має за дуже корму, а хвасты
сут барз жарлочны и забирают з почвы дуже
пожывы, передовсім азот, фосфор и потас бо
без них так як каждая рослина не можут жы-
ти. И забирают тых навозов дуже, бо дако-
тры з них двараз больше як овес. Еслибы
далося легко выказати тоту страту, яку має
газда от тых злодіев — хвастов — то нееден
газда хопилбыся за голову, але газда того не
видит и длятого о том не мыслит.

Не дивота аджеж, же нераз зберат газда

з дост удобренного поля марны плоды, бо
хвасты го окрадают. Господар робит тяжко
возит гной на поле, розметує, ове, купує
штучны навозы, а кто з того користат. Хва-
сты пасутся — роснут як на дрожжах, а го-
сподар бідує.

Час однак покончыти з тьма злодіями, бо
мы за бідны, шtbody нас окрадано. Хвасты
треба нищыти постоянно и вшиткыма можли-
выма способами.

При засівах треба уважати, шtbody сіяти
чысте зерно. На берегах поля и на меджах,
под плотами и домами треба хвасты косити,
жебы не выдали насіня.

При рослинах окоповых маме можность
вычсытити поле, але горше ест при ярых за-
сівах. Нераз случается, же господар посіал
чысте зерно, а помимо того хвасты роснут.
Дієся того длятого, же одны хвасты, як осе-
тя — отрастают з кореня, иншы, як пчолнак,
заховуют через килька літ силу килчыня. Если
ей не нищыме то перед зимом высыпусєя
на полях насіня, котре занечышат поля на
долгы літа.

Хвасты треба отже нищыти радикально.
Найліпше нищит шыроколистны хвасты спо-
рошкованый кайнит, або меленый, неолійова-
ный 19% азотняк. Першого даєме на морг
300—350 kg а другого 60—90 kg.

Так кайнит як и азотняк має тото свойство же притігат до себе вільгот. Достаючи ся на листки хвастов вытягат з них воду и палит их. Порошок кайнита и азотняка не затримуєся на узких листках збожа, а осідат на широкых листках хвастов. — Треба сіяти втотчас, як хвасты ишы молоды, мают по три до 4 листков. Треба сіяти вчас рано, коли хвасты сут ишы мокры от росы а ден ест сонечный, бо чым сонце сильнійше гріє, тым ліпше выпалит хвасты. Не можна сіяти там, где ест конич бо выпалилобы также конич разом з хвастами.

Як належит ховати коровы

Написал. инж. Андрей Гумецкий абс. землед. Академии

Годовля коров подобно, як и инших домашних звірат стоит в наших селах низко. Полягат она звичайно на том, што в зимі коровам привязаным на стало до жолоба подаєся суху солому часом змішану зо сіном и погодивше поится водом. В літі и в осени женєся их нераз по пару кильометров на маловартостевы пасовиска, де бурієся гола земля,

Цілком инакше представляєся тота справа в господарствах фольварчных, або навет и малых, але совокупленых в так званы: „Союзы контролі обор“ яки поставили собі за ціль поправити выдайност молока у коров через побольшену опіку над нима.

Знаме вшиткы добрі, як велике значєне має для людского здравя свіже повітре, рух, відповідня температура, окружєне, світло и хемичны промена сонця, а не хцєме зрозуміти, што корова, тота наша кормителька ест также живучым существом и має не менше от човека право до вшиткых благ земских и космичных.

Тому то памятайте што не выстарчыт для ней брудна и темна без окон стайня, она мусит мати што найменше двараз до року выбілену вапном стайню мусит мати в той стайні дост світла, дальше, відповідный отпływ гнояниці, штобы в стайні не было мокро. Крім того коло стайні треба огородити кусник площы и зробиит так званый „окольник“ штобы коровы могли так літом як и взимі перейтися, зажити свіжого повітря и потребного руху, бо привязованє до одного місця коров шкодит им.

Пасовиско, если хочєме, штобы принесло корист корові, мусит быти добре. Не повинно быти ани мокро, ани сухе. На мокрому роснут звичайно квасны травы и мох — шкодливы для здоровья коров, притом коровы можут достати мотылицю. За сухе пасовиско має в травах за мало воды. Пасовиско повинно быти поділенє бодай на три части, котры треба постепенно спасати, мусит быти звапнованє, отвтно навєзєне и засіяне мішанком трав и коничу, переважно білою, бо тот найліпше зносит надгрызанє и удоптуванє. — Если

пасовиска маєме мало, або если ест оно за слабе и не дає отвтного приросту, тогды сієме коло хаты мішанку зложєну з рослин метеликовых (бобику, пелюшкы, выкы) и овса и тым докормлюєме коровы.

Корова в паші має найти дуже важных складников и тыма сут: білко, толщ, углеводаны, сирє волокно минеральны соли, вода и витамины.

(Продолженє в слідующем номері).

Чом ест кризис?

В давных часах не лем в Дошні
Не лем в Ропках, ци в Зубрику,
Носили люде холошні
Чугы, гунькы и брусликы
Але всядиль в наших горах
В каждом, нашем, руском селі
Полотно сой сами ткали
На гачы и на кошелі
И сами сой волну пряли,
Ткач был всяди, де ся рушыл
И добрі ся вшиткы мали
Ци в Тыляві, ци в Богущі
Днеска кризис, брак роботы


Цєнта нема никт при душі
А бетяре и гунцвоты
Сут сядиваль, де ся рушыш
Днеска хоц кто „ріже пана“
И гунькы ся реку встыдат
Носит лем купче убраня
Але взяте на борг в жыда.

Сват.

II. За погариком.

Газда I.: Повічте ле мі, ци прудко можна сподіватися конця світа?

Газда II.: Признамся, же над тым, реку, ємся ишы не намысливал, але знам, же не прудше, аж як вшиткы Люсяне придут на Великден домив.



Та ход же скорше старый, бо нам тоты быдлыта повлазят до загороды и шкоды наробят.

Писмо В. Березины

— Кумо, чи не телячыли вы нашого бачати?
Кума: телячыли, телячыли за драло лозы и побігло у хвосты!

Знаєте люде я уж пару дней сам до себе сміюся! Приду до хыжы стану дагде обернуся до кута и праскам зо сміху. Стара на мене позерат боком и уж гварила мамі цибы дагде не завезти мене до докторя... Бо сміятися сам зо себе и до себе то значит, же штоси то не так ест, як має быти!

Приду дагде до сусіда до газды и газдовина кривитися и скаржитися на податкы, же тяжкы часы, а мене зас сміх зберат и... иду гет з хыжы... А ци знаєте люде чога я так сміюся? Я сміюся зато, бо чує от пару дней,

же наша „рідна мати Україна“ уж поїде гет... з наших Карпат и то внег!

Але жебы была тому мойому сміхови даяка границя то я задумал писати до „Лемка“ и вы хлопы не смійтеся бо тепер иде яр, треба бороны рыхтувати. А я уж зрыхтувал фуру смітя и як поїде з гор остатний українец, то я зо старом (уж ся буду нато тримал) зараз фуру на дорогу и висыплю за ним тото смітя, жебы уж не мог вернути и жебы поїхал гет на Украину там, де реве Дніпро — ревуый.

Но, але як вы там коло Санча жыєте? Бо мене ишы все сміх надырбує... Уж єм негоден выповісти „капуста“ лем выгварям: „фафуста“... але добрі, же ишы є тота фафуста.

Але чога Вы з редакциом запхалися аж там до Санча? преця середина Лемковщины не є Санч.

А може не хочєте смотріти як „помандрус“ Украина, то жебы жалю не было?

Не боитєся, бо я гєв зовуся Березина то я Вас розвесєлю и ищи заспівамє: „... курилася дороженька“.

А мешкам коло Яслиск, як бы кто іхал то хыжу мам коло дороги и коні сой напоит и я вшитко оповім, бо я таке люблю и прошу зайти!

Но як Вы там з паском, бо я нич. Было кус омылкы з пшеницьом, стара казала перецилндрувати, и впєкла даке паша.

А што чути з нашим Гунянком а то мой нанашко. Нанашку приходте домив але просто до мене, мам для Вас станцию лем скоро, поможеєте Украину выкropicити!

Поздоровям Вас Братя Лемкы єдным словом. Читайте „Лемка“ и других заохочайте.

Ваньо Березина.

выдатки, на котры не стати малых рольников. Нанесло бы то велику страту особливо нашим селам, де нераз цілы села утримуються лем з того, же продают молоко масло и сыр. Дятого то малорольны господары наших сел просят не стосовати новаго закону в лемковских повітах по крайней мірі на тот час, який єст потребный на исполнене вшытких условий, предвидженых законом.

Гладышов. Біда у нас, ніт єдности; люди вмисто братися до просвітительной и экономичной роботы — тратят час на зваду. В часі войны спалили нам церковь мадьяре и от того часу не маме церкви, хоц мунуло уж 20 літ. Правда — часы тяжкы, але были и добры можна было легко выбудовати, лем же не было кому старатися о будову церкви, бо украинскы єгомосці стараються не о віру и домы Божы лем о украинизацию села. Тото недбальство украинскых єгомосців в церковных справах и проявляна украинизацийна робота довели у нас до того, же част наших людей прешла на віру православну. Мы не выступаме против них — але все не єст то для нас добрі, бо раньше была єдност, а тепер ей ніт. Тепер єдны идут до уніятской, други до православной церкви. — От и на Йордан того року были два водосвятя, православне и уніятске. Народа было понад 200 душ з нашего села, Вірхні и Баниці але люде розділены не так, як то давнійше было, же вшыткы ишли разом. Моглабы нас злучыти читальня — але сут также дві — и „Просвіта“ и им. М. Качковского — и зас ніт єдности. — Зрештом ніт кому занятыся читальняном роботом. Молодеж любит забавы и театральны представления и до того горнеся але на жаль представлень не робит, бо брак нам инструкторов в нашем селі. ніт интеллигенции русской, котра заняла бы ся просвітительном роботом. Повинен Лемковский Союз застановитися — и постаратися о того, штобы мы достали инструктора, або руского учителя, котрый занялбыся також выхованьом старшой молодежи Єст того у нас нагляче, бо наша читальня им Качковского має свою библиотеку и стоиць материяльно сильно, так, же хочеме приступити навет до будовы власного дому. Але тот дом без рускых священников и учителей и то таких, котры занялибы ся народном роботом не принесе нам жадной користи. Дятого то Лемковский Союз повинен старатися усунути з нашего села болячку.

Гладышовян.

Торонто, Канада. До Вас Братя Лемкы Перший раз мам способность одозватися до Вас брата на родной землі, на своей лемковской бесіді и в своей газеті Лемко. Барз нас всіх лемков гет на чужині потішыла тота газета на так близком нам материнском языке и так легкой правописи для нас што ей не може нияка друга заступити.

А потішыла нас ишы и тым, же при той газеті угрупує ся весь наш народ и выскаже свой боль, познат причины біды и разом єдным фронтом буде ся старалю усунути. Бо до того часу для нас писали рускы газеты, писали о нас польскы а украинці аж почали нам выдавати, но тото вшытко, то лем для того, жебы мали о чом писати и судити на рижны способы. Сами мы о собі в своем имени нигде не выступали так як бы нас нич не обходило, нич не боліло, так, як бы мы были глухы и безязычны. Но тоты часы давно минули, жебы добра дакто нам яко народу — живому жычыл, або дакто домагался за наши интересы.

Тепер през газету „Лемко“ Вы дороги брате пробесідували своим власным языком, и голос газеты „Лемко“ єст голосом Вашым.

Тото же Вы зробили крок в перед призыве Вам и певны зме же Ваша организация Лемковский Союз розвие ся и злучыт Вас душевно, як родных братов так, як злучыла нас лемков своя организация гев на эмиграции в Америкі и Канаді. Через свою культурно просвітительну роботу она стерла меже нами релігийны и обрядовы нетерпимости, мы зрозуміли, же нам яко униженому народу належыт єдно право до жытя, бо мы єдны и други єднако пригнетены общом бідом.

Віриме — кріпко віриме же Вы братя объедините свои мысли разом возьмете ся разом зи кооперацию, свое право, яке вам призна-

яко гражданам культурных держав.

И зато мы шлеме Вам из за далекого моря желаня розвивати себе и свои способности в организувану єдност. злучайтесь и товды и мы будеме душевно з Вами звязаны В том желаю Вам полного успіха. З братской любовию к Вам

Николай Циляк
секр Лемко-Союза.

За пренумерату дякуєме. Редакция.

N. A. Cislak,

256 Adelaide. St. W. Toronto, Ont. Canada.

Розослано по лемковских селах нову украинску газету „Пролом“ котра накликує до згоды. Але чытаючы тоту газету стаєся ясным, же тота згода полягат на том, штобы мы отдали украинцям вшытко што маме. Таку саму згду голосили перед 50 роками украинці и так для святой згоды взяли „Дністер“ Народну Торговлю и други наши маєткы. При такой згоді мы бы остали голы.

Горлиці. В Горлицях містится при улиці Венгерской 11. Отділене Р. С. Р. К. (Ревизийного Союза Рускых Кооперативов) и там належыт звертатися во вшытких справах кооперативных и чытальняных.

Управитель того отділення Гн О. Яновицкий видячы, што у нас кооперация слабо розвиватся взялся дуже енергично за роботу и устроєе в повітах новосандецком и горлицком много окружных кооперативных анкет, як также заводит порядок в заложених уж кооперативах. Єст надежда, што при его помочи тот занедбана отрасль нашего господарчого жытя начне приносити користи на шым селам.

Устье Руске. Дня 15 IV. отбылася ч нас Окружна Анкета кооперативна на котрой было много людей так з Устья як и доокрестных сел. По рефераті Гна Яновицкого заберали голослы участники и принято ряд рішений — маючых на цілі поднести экономичный уровень наших сел.

Воловец. Гн Яновицкий устроил в нашем секі экономичный з'їзд — анкету дня 22. IV. на котром выголосил прекрасный реферат, заохочуючы людей до организаций и закладания кооператив.

Мацієва. Дня 9. IV. т. р. отбылося у нас открытє читальні им. М. Качковского. На тото открытє приіхало много людей з сусідных сел, котрых радостно повитали Мацієвяне. От имени читальні в Крыниці и Лемковского Союза присутствовал Ваньо Ворона, котрый в теплой промові выповіл, як то правда перемагат брехню — и поднес стойкост Мацієвян, котрых украинці безуспішно баламутят ишы от передвоенных часов. — До чытальні вписалося понад 50 членов.

Королева Руска. В послідных часах дає уважытися в Новосандецком повті оживлене на полю кооперации. Перед роком основано в Крыниці повітовый кооператив „Прогрес“ котрый розвиватся добрі. Має уж 1 отділ в Богуші, а 15/IV. утворено другий отділ того кооператива в Королеві Руской. На скликану в той цілі анкету явилося много людей так з Королевы як и сусідных сел. На анкету приіхал также от Лемковского Союза Гн М. Трохановский. По выголосеню через него реферату вписалося в члены кооператива 37 людей и рішено открытє отділ кооп. „Прогрес“ в Крыниці в дому Григ. Льюрчака.

Крыниці. Дня 10. IV. отогрالی члены чытальні им. М. Качковского штучку: „Несчестна любов“ при переполненной салі. — Дня 22. IV. отограно зо школьными дітми штучку: „Русалка жаба“ а дня 29. IV. має Заряд устроити для членов чытальні „свячене“. На свята приготвила абсолювентка уч. Семин. Ольга Громосьяк приятну неожыданност Крыничанам, бо приготвила мішаний хор, котрый вывазался зо своей задачей цілком добрі.

Тылич. Дня 1. IV. т. р. загостили до нас милы гости а именно театральный кружок из Крыниці, котрый отограл штучку: „Несчестна любов“. Гра была добра, а и людей пришло много, котры в милом настрою провели час.

Солотвины. В другой ден Великодня отограл кружок театральный штучку „Несчестна любов“ при великом участію народа.

Што чути в світі? Недавно величезный пожар спалил праві 3/4 японского міста Гакодаге положеного на острові Гокаидо и чыслячого 164000 жителей В огню згоріло понад 1000 людей, а чысло погорельцев, котры схоронилися на кораблях и рыбацкых лодках обчысляют на 100 000.

Праві в том самом часі знищыл гураган, котрый шаліл цілу ноч місто Токио, котрый убил понад 80 людей. Ранених єст около 300 Гураган позривал получения желізнодорожны и уличны.

Край, до котрого не пуцают женщын. Суровы обычаи на св. горі Атос. В Македонии єст гора Атос. Вокруг той горы єст монастырска република, котра складатся з 20 монастырей греческых, заселених через 500 монахов. В монастырях обовязуют барз остры переписы. Монахом не вольно їсти мяса, обовязуют их барз часты посты и долгы молитвы так в ночи як и в ден. Заборонене єст кажде голосне слово. Не вольно там ити жадной женщын, а навет ніт там ани коров и ослиц.

Во Відні єст при университеті клиника, в котрой сут законсервованы в спиритусі всякого рода потворы. — Єст там теля о двох головах, сут телята зроснены лопатками, єст теля о голові и ногах пса, свиня о голові малпы и козы о семох ногах. Таки потворкы не сут способны до жытя и гынут звычайно по 2 годинах; найдолше жиють они 2 дні.

Желізнодорожна катастрофа в Австрии. 10-го квітня вылетіл зо шын скорый поїзд котрый іхал Віден—Париж—Лондон. Паровоз, службовый вагон и 2 почтовы перевернулися, а спальный вагон и два парыжскы выскочыли зо шын. Убитый машиниста — и 15 людей тяжко ранених. Катастрофа повстала в наслідок роскручынна шын. В звязи з катастрофою арештовано много людей.

Во Франции все неспокойно. Центральный комитет сконфедеруваного картелю урядников выступил против обниження пенсий урядникам и завозвал вшытких урядников до выступления против податковым ошустам, шкандалам финансовым и політыці дефляційной, котра провадит до ухудшеня условий быту вшыткой трудовой интеллигенции, работников и хлопов.

Англия протестує, а Німці вооружаються дальше. В том році Німці перезначыли на вооружыня войска значно веце, як тамтого року, против чого Англия протестує.

В Москві заарештувано в другой ден Великодных Свят 30 высших урядников советских за тото, же попалися и вели себе неприличном засуджено их по 30 дней арешту.

В Америці штрейкуют В Детроит заштрайкували в фабриці автомобилей Форда, в Алабама шрейкуют урядники почты и работники вшытких шахт.

Складайте Ваши ошадности

В КОМУНАЛЬНОЙ

Касі Ошадности

в Крыниці.

|| Она дає полную гваранцию,
|| платит добрый процент —
|| и выплчат зараз выпо-
|| віджены грошы.

Уділят она также
пожычок на невысокий процент.